

高雄小故事

飛佇空中看火車

撰文／吳家銘



佇我細漢的時，是躡佇「籬仔內」，倚二聖路恰凱旋路 hit-tah，¹ 邊仔就是「高雄機廠」，「高雄機廠」是臺灣鐵路局用來修理火車的所在，原本是佇鹽埕埔的高雄港站，1975 年才徙——來，彼陣，伊拄徙來無幾冬，不時攏有火車來來去去。阮兜的厝，是彼的時代上濟人躡——的四樓彼款的公寓，阮兜是佇三樓，窗仔向西片，彼陣邊仔閣無起遐濟的厝，外口雖罔看袂著北片的「高雄機廠」，毋過看——出去就是凱旋路，閣有恰凱旋路平行的鐵枝路，不時攏看會著鐵枝路頂有火車經過。

「Khōng-lòng, khōng-lòng」²、「Khōng-lòng, khōng-lòng」，濟就是我細漢時，躡佇籬仔內遐，上 tsiáp³ 聽著的聲，拄開始因為窗仔傷懸我看袂著，毋知影彼是啥？有一擺阿母共我抱起來看，共我講彼就叫做火車，彼陣我才一、兩歲，啥物閣攏毋捌——咧，煞顛倒知影彼是火車駛——過的聲。彼擺了後，便若聽著「Khōng-lòng, khōng-lòng」的聲，我就會叫阿爸阿母，共我抱——起——來，予我會當看著火車，佇這個無幾秒的時間內底，我就會使變做一隻足輕足輕的鳥仔，飛佇空中看火車，雖罔時間無佹長，毋過我就感覺足心適、足歡喜！彼陣的情境，到今抑閣會記得。

我躡佇「籬仔內」公寓的時間，無到五冬，就搬——走——矣，凱旋路的這條鐵枝路，佇我捌代誌的時陣，就已經干焦咧載貨爾爾，所以火車的車班就無親像載人的遐 tsiáp，幾若冬前，就完全攏無咧用——阿。毋過這站仔，顛倒因為欲起捷運，共這條鐵路改做

1 hit-tah：那邊。

2 Khōng-lòng, khōng-lòng：火車開在鐵軌上時，輪子和鐵軌接觸碰撞所發出的聲音。

3 tsiáp：常常，很頻繁。

輕鐵，⁴ 彼陣細漢看——著的鐵枝路，就會變做輕鐵的 C36 站，雖罔已經聽袂著「Khōng-lòng, khōng-lòng」的聲，毋過看著這條鐵路閣活——過一來一矣，予我閣想起細漢時，阿爸恰阿母抱我佇空中看火車的記持。

本文榮獲「2017 年高雄小故事」第二級佳作



高雄市立歷史博物館

KAOHSIUNG MUSEUM OF HISTORY

4 輕鐵：捷運輕軌鐵道。